

四庫全書

集部

欽定四庫全書

集部

學餘堂詩集卷

四十三

詳校官檢討臣劉錫五

助教臣常循覆勘

總校官庶吉士臣何思鈞

校對官檢討臣蕭九成

謄錄監生臣呂璠

謄錄監生臣劉亮果

欽定四庫全書

學餘堂詩集卷四十

翰林院侍讀施閏章撰

七言律

間王阮亭農部擢補侍讀

才力羣推稱石渠漢庭特拜重相如上林札給新成賦
秘閣燈鈔未見書文字聲名騰
禁闈平生懷抱滿樵漁
傳聞珥筆辛勤甚退食常需列炬初

魏環極侍郎見寄即用韵

青溪散髮十年餘
輦下詩來錦不如
伊傅何當懷野老
柴桑元自愛吾廬
敢矜詞客哀時賦
閒寫農家種樹書
憶到龍門成久別
蹉跎歲月恐全虛

次答徐善長庶常見寄

携鋤種藥傍荒原
歸卧誰言野老尊
自愛名山閒蠟屐
偶邀逸客止氈樽
雨添籬竹從妨逕
春漲沙鷗許到門
同舍舊時詩伴盡
何當芸閣憶江村

寄鄧偶樵荆南

金陵握手八年過，千騎長驅興若何。
禁裏星辰搖劍佩，軍前詞賦半饒歌。
山川坐控荆門險，雲物閒看夢澤多。
見說王師資借著，天南早晚罷橫戈。

次韻馬丈虎表弟贈別

投老東山向十年，徵書忽下轉茫然。
江城樹色孤帆暮，驛路蟬聲七月天。
到日定催斑鬢白，歸心時趁朔風旋。
浮生晚節違親舊，何似松間枕石眠。

寄壽吳園次六十

何必身如老鶴形，蒼顏相對眼俱清。
政成柳惲高吟地，客占滄浪舊日亭。
北闕文詞傳畫省，東山絲竹笑丹經。
吳門角里看雲氣，不是尋常處士星。

二

千人石上興悠然，清絕追歡夜月天。
家破尚賒留客酒，身閒頻上釣魚船。
藏書林屋紛殘帙，判袂風烟又四年。
衰齒慚予真伯仲，題詩那得共樽前。

留別金長真憲副

青溪綠酒好相將
笛步風微水榭涼
苦憶論文坐官閣
重堪分手別河梁
艤舫銜尾江鷗警
堠火連天客路長
此去蒟門秋色早
離情還逐雁南翔

白下贈何蓀雲

滄海塵生未白頭
石城耆舊自風流
多時門閤推平叔
溷跡行藏且伯休
二酉書移亭閣滿
六朝山好杖藜遊
傳家象緯稱能事
甘石輸君定幾籌

君世擅天文
厯算之學

登歌風臺

雄畧其如隆準何高臺憑眺客來過雲山芒碭秋風起
雞犬新豐夕照多天下至今思猛士眼中依舊剩黃河
休輕垓下歌非匹雙淚興亡總逝波

濟南飲家泰瞻方伯署齋

七二泉邊復此杯十年懷抱向君開連枝會喜天涯得
片月光分岱頂來箕斗微輸憂國淚西南飛輓濟時才

懸知節鉞尋常事驅馬燕雲首重回

時楚粵方
急軍餉

重登千佛山

廿年重上郡南山一指泉邊枕漱還

一 巖壁有指泉

世變轉添

精舍好客遊終讓片雲閒青峰數點秋光裏曠野孤城

夕照間誰解舜畊遺跡在不勝懷古悵躋攀

古稱舜耕山後人琢

石為佛遂
蒙今名

晚尋趵突泉

平生野興愛清光駐馬看泉赴夕陽地涌舜山爭道急
源從王屋倒流長舊傳殘碣歸鮫室新偃飛虹盡石梁

老我題詩重倚檻，會情獨立對滄浪。

往木橋
皆易石

觀馬

端居紫禁拱，垂裳還向天。閑問驪駒自有六龍
飛御仗，豈思八駿騁遐荒。神駒物色驪黃外，宛馬來歸
道路長。嶺嶠此時需捷伐，功成鐵騎待騰驤。

都下贈陳其年

青鬃俄看有白絲，別君猶記少年時。塵中見面寧相識，
亂後逢人數寄詩。畏俗疎狂龍性在，買姬飄轉蚌珠遲。

雄文此日同推薦賦奏長揚更屬誰

次韵楊六謙九日同諸公集黑龍潭時余偶病未

出

長安雲物易為秋九日羣登傍浦樓雷雨此中生絕壑
蒹葭何處有孤舟西山倒影當尊酒大漠悲風試客裘
誰信少文懷五嶽良時偏臥不同遊

二

莽蕩風烟接薊丘蛟宮深處野亭幽鷗閒故狎筵前客

葉落遙看木未棲
舊日金臺荒草在
千年易水白雲秋
憑高詞賦吾何有
歸夢滄江杜若洲

高澹人中翰出紙屬書因賦贈

仙標特達迥難攀
賜第高居霄漢間
日捧圖書隨帝座
風吹咳唾接天顏
爐烟香裏詩篇出
玉漏聲中劍佩還
鄉夢縱思湖上好
此生應讓白鷗閒

舒康伯示北征詩有作

漢江歸夢莫滔滔
布襪青鞋興自豪
射策生涯供作客

倚天懷抱見登高悲歌終古聞燕市絕調何人復楚騷

黃菊叢枝還好 在旗亭斗酒待持螯

有重九登高四詩

過沈學士繹堂即事次韵

比鄰步履日初寒竹榻高齋過藥欄
病起勞人還筆札談深野客共盤餐
髣髴毛別後關心劇詩卷花前把酒看
借問休文腰太瘦蟬貂何似鹿皮冠

次答李渭清

時同被徵召讀書禁城寺寓

朔風動地夕陽微時憶招提靜掩扉
把卷聞鐘應獨笑

重城匹馬忍相違
烽烟浩蕩頻看劍
雨雪羈棲夢拂衣
乍喜高歌餘數子
眼中猶見海濤飛

時山左及
門多工詩

宋牧仲比部權贛關

誰共論才天地間
醉歌京洛日追攀
秋官讀律心長苦
詞客持籌意自閒
廬嶽雪殘明五老
薜孤臺迴盡千山
嶺南近報烽烟息
賈舶應憐亂後還

王春如同年令寧都

近嶺梅花照眼初
雙江南畔好驅車
蠻陬鞞鼓知方定

山縣行歌治有餘地大人家滿巖谷年登壤賦益軍儲

金精石室多棲遁倘肯論文式草廬

易堂魏冰叔諸子讀書金精

阮懷携酒饌就發若客館夜集

同大可雪懷

邸舍曲坐如山堂怪君別久顏未蒼從教下榻有知己
那免回頭思故鄉小酌客中何爛漫高談夜半轉猖狂
燈殘歌罷各迴騎皎皎寒星天欲霜

得阮懷見和夜集詩有合并今夕當還鄉之句因

憶故鄉諸游好

謂緝生雨若淵公方
鄰定九朕虞耦長

素交何日集山堂獨對清樽見老蒼戰壘頻驚從久客
浮雲相聚各思鄉真仙名障誰能盡仙有九障名居其一才子飢
驅轉易狂長憶踏歌人影亂謝公樓畔月如霜

陳說嶺學士見過論詩兼示北鎮集

春明旅食阻招尋夙夜間君在禁林官領石渠人望屬
朝回蓮炬

主恩深舊游文酒南皮會出使天山塞下吟重藉鍾期
心賞切相看倘許共知音

二

崔嵬北鎮碧雲端
瀚海盧龍道路難
馬向遼西天際去
山從塞外雪中看
使星歷盡沙場遠
詩卷高臨碣石寒
往歲聯鑣真忝竊
眼前飛將早登壇

京邸對雪

十月二十六日

曙光虛白徧人間
車馬長安幾處閒
鵙鵲凝寒連北極
林嵐積素隱西山
甘泉獵罷迴龍馭
瘴海烽傳愴客顏
獨臥栖遲虛荏苒
鄉心一夜滿燕關

走筆書李幼菴小牋

時自竟陵令被徵
舊有華嶽諸詩

隋苑蕭灘恨別離
徵車迢遞會何遲
歌成華嶽秦聲在
宦薄天南楚客悲
海嶠縱橫還羽檄
江關漂轉總文辭
披衣隔巷好相就
月白霜寒勸酒卮

過王山長

相見還如兩布衣
官齋差勝舊漁磯
浮沉世路已衰晚
角逐詞場今是非
傍架抽書容借讀
到門促坐笑忘歸
蘄丘極目江潭遠
吏隱風流似爾稀

張松臺書至自榮澤謫所

舊偃師令坐事
奪官安置榮澤

失路仍難賦遂初歸田夢久髻應疎心間麋鹿甘身老
地險魚龍伴客居生計菜蕪塵釜在交情緱嶺酒杯餘

河陽鴻雁燕山雪腸斷離愁晚歲書

余過偃師君
送別至緱山

詔賜被薦諸臣月廩恭紀

未到鸚班寵澤垂招賢特典荷

皇慈賜沾雨雪無衣日恩重宮廷減饕時不待賣文從

取酒漫勞索米好吟詩微臣竊祿今衰晚只合衙門賦

樂飢

御札賜內直侍臣天花和王侍讀

靈卉蒙將 膺藻誇驚分珍饌出 天家秀疑漢殿銅池草
潔比雲霄玉樹花生摘餘香如帶露烹來仙液勝餐霞
共傳藜閣承 恩重不數東陵五色瓜

簡張敦復侍講

東南爭道出羣才奏頌陳思入幾回夜半燈前 宣室召日
高花下 講筵開書抽石閣多藏本露近金莖有 賜杯

遊幸甘泉新 駐蹕倘容休沐到鄒枚

為尤悔菴悼止

空期偕隱恨何如 鍾郝徽音歿有餘 身貴蒿簪仍舊物
病拋錦字竟無書 教兒幾度丸熊膽 垂老難忘挽鹿車
共道安仁情太劇 可堪重促髮毛疎

見宋荔裳遺詩悽然有作

君按察四川會滇蜀反道梗憂憤死

好客平生酒不空 高歌零落痛無窮 西川終古流殘淚
東海從今少大風 國士魂銷多難後 離人望斷九原中

張堪妻子應誰託巢卵長拋虎豹叢

午門謝 頌月廩

鳳城魚鑰啟朝暉紫陌清霜拜瑣闈廿載老臣還詣

闕九重仙禁想垂衣弓旌特舉賢良盡雨露先 頌禮遇稀

聞道金雞方下 詔天門冉冉五雲飛

奉贈梁大司農崇村

中朝曳履荷宸恩復有懸書在國門楚粵軍儲時仰屋
應劉詞客夜開尊多才歷徧諸曹長秘本看餘萬卷存

歲儉繭絲民力盡
舍情賑貸向誰論

二

驅車曾到尉它城
粵嶠爭傳陸賈名
玉節坐銷豺虎亂
塗歌時和鷓鴣聲
漢廷錢賦增緡筭
禹甸關山尚甲兵
天下安危公等在
猶煩推轂及書生

公曾持節使
粵有嶺南集

喜白仲調評事移寓比鄰

旅服愁沾車馬塵
過從日夕不嫌頻
銜杯談讌今鄰叟
同學追隨舊黨人
定國高門惟尚德
東方索米豈長貧

相看忽憶江鄉好，殘臘疎梅早放春。

寄懷勞書升學使山左

談經鄒魯似君稀，泰岱峰頭獨振衣。
懷抱遠涵江月白，文章橫捲海雲飛。
持橫南北頻專席，橐筆班揚憶瑣闈。
獨樹殘碑今在否，明湖相見惜相違。

署中有高槐，予舊額為獨樹軒，刻石。

其下

書成寶慈先生集後

百年誰許是全人，奏對前朝舊絕倫。
官似于公三執法

名齊汲直數批鱗清流去就安危繫高隱林泉述作新
沒齒蝸廬千古事會歌楚些重沾巾

公署所居曰蝸廬
子視學山左曾有

言誄

除夕同雪懷

浮生遲暮身如客久客重禁天一涯歲序欺人慵守歲
家書到眼當還家清尊話舊殷勤酌紅燭邀春爛漫花
此夕鹿門妻子在不眠相對說京華

是日得
家報

元旦試筆

霽日屠蘇暖客筵
歲華良稱早春天
鼓鐘報曙千門動
劍佩趨朝九陌傳
疎節公卿諳故態
驚心梅柳入新年
烽塵倘息吾甘老
夢在雙溪疊嶂邊

連歲朝賀皆免今始御殿

山左劉木齋督學江南

闕下論文興不窮
才如子政幾人同
臨淄舊聚諸儒盛
吳會行看吾道東
江送錦帆芳草外
春深絳帳百花中
年來竹箭催殘甚
披拂還憑大國風

李容齋學士見示近年詩感贈

詩篇還肯問閒人闕下爭傳啟沃頻
累校竒書元秘閣
新開邸第舊平津坐親魚鳥江潭興
花傍園亭韋曲春
退食從容明月出不妨文酒夜留賓

其邸舍即柏鄉相國舊宅池臺畧具

唐寓菴大同書至

宦跡浮雲好是閒
東西天畔各蒼顏
黃榆白草時行塞
畫舫青溪舊對山
燕市尺書衝積雪
雁門千里望重關
春風倦客愁無那
憑仗梅花伴使還

王昊廬宮詹晚過有贈

時見示紀年詩

南陌朝朝聽玉珂不辭迴轍晚相過
篇章早占風流盡
宦達偏含涕淚多
遙揖安期稱弟子
數懷惠遠問巖阿
却疑學士鍾情甚
我亦間歌喚奈何

上元前一日入遊 御苑登洗粧臺

禁林燈節許人來
太液蒼茫接漢回
前代御舟猶水榭
中天白堦舊粧臺
苑亭重繞滄洲出
宮殿高擎麗日開
向夕含情遙指點
景山終古自崔嵬

為陳山農壽其尊公筠修翁七十

梅源丈人陶隱居帶索長歌樂有餘萬卷坐深三逕草
扁舟看煮四腮魚山中教授幾成市肘後平生自著書
滿眼桃花照樽酒共言斑鬢未全疎

送汪郡丞之秋浦

東風初拂柳條斜南去褰帷傍水涯舊掌圖書開秘府
新辭禁苑放仙槎夢中起草還三殿樓上看山是九華
秋浦題詩懷李白江城滿眼正飛花

翁武元之官黃州陳康侯索一言之贈

漫說交遊萬事情
相聞客舍倦過從
夢回明聖湖頭月
吟過慈仁寺裏松
燕市尊開文字飲
楚天春去水雲重
岐亭赤壁風流地
拄笏西看江上峰

二月二日雪

夜半疎簾作曙暉
朝傳雪片壓雙扉
宮梅苑柳春先入
隴麥畦蔬願不違
文酒兔園諸子在
野橋驢背幾人歸
久晴轉覺輕寒好
捲幔從教點客衣

己未二月朔同被

徵諸臣集試

體仁閣

上賜食且 宣諭曰館選廷試例不給饌嘉爾等學行名
儒優以曠典是日治南饌張椅坐蓋前所未有也恭

賦紀

思

減膳深知念萬方 大官珍賜喜初嘗天漿捧出金莖遠
宮饌分來玉粒香葵藿腐儒沾醉飽 絲綸溫語重輝
光華筵異數承 思渥載筆還歌湛露章

元旦擬早朝

丹闕晨開敞 御筵朝元會好傍
爐烟春回曉日蜻筵
暖風細卿雲鳳閣懸 宵旰勤思
荒服外衣冠拜舞
聖人前稱觴進璧渾閒事共擬
南征奏凱篇

同毛會侯曹賓及梅耜長宿張見陽西山別業

馬首看山日向西藍田莊好一招携
蘿陰別館綠溪靜
竹外繁花拂檻低雨過林深雲不散
殘春谷暖鳥初啼
千峰四面青如許醉逐東風信杖藜

彭直上孝廉下第歸南陽

禹峰開府之子

南陽歸去舊山廬到日花翻紅藥初自有天人供奉對
不妨河岳暫樵漁一門才號高陽里兩葉經傳中壘書
猶憶論詩接開府春明執手重躊躇

寄阮巖山

風期爭說嗣宗稀五馬天中早拂衣瘴海人傳馴雉處
澄江花繞釣魚磯怡顏大藥留春鬢高枕晴窻見翠微
子弟能文誰得似園林絲竹莫教違

送崔友尚南還用耦長韵

一尊未醉忽言歸紅葉花時手重揮
雨歇宮雲遙送馬風回江柳綠侵衣
看山好就烟中寺領客還開竹裏扉
眼底崔駟人共識離情鄉思却依依

答俞達夫神木見寄

尺書經歲達長安恨別驚心破涕看
古樹冰霜春不達炎天鞞鞫晝猶寒
請纓虎穴孤忠見倚劍龍堆獨戍難
漢主還應思李牧磧雲邊月路漫漫

鎮將叛時獨以守
備抗節使人間道

請益
兵

馮少司寇再來席上作

舊國仙臺碧海涯
振衣曾躡赤城霞
眼前京雒從為客
夢裏滇雲尚有家
貪坐夜闌移片月
含情春去見飛花
承明曳履還青鬢
莫遣鄉心感歲華

送張見陽之任江華

春游同醉憶花亭
遠送當筵酒易醒
正馬直臨三楚盡
仙峰深入九嶷青
家餘旌節傳開府
亂定風檣過洞庭
但使道州遺澤在
春陵山畔好重經

劉蘧菴進士歸南陵省覲

浮雲馬首惜相違，客舍鄉情似汝稀。
南浦暫辭金闕去，北堂親見綵衣歸。
文章價重還清帙，亭館花深接翠微。
鮑氏乘驄君舊業，莫因調餗戀漁磯。

病中答問亭善長見示次韻

秋聲昨夜到階除，藥白茶鐙獨晏如。
問訊數回窮巷客，疎慵從委半牀書。
身依北闕經旬卧，心憶青溪夢夜漁。
遠枉瑤華當七發，一庭新月悵離居。

趙雲岑監司湖南驛鹽

青門殘暑重驅車廿載交情白首餘
造次衡陽當日事
間關河海數行書
官臨三楚旌麾遠地靜
諸蠻堆火疎
好客平生懷抱在
持籌鹽鐵意何如

葉井叔暫歸黃州

節近重陽不肯畱
黃花苦憶故園秋
高歌去傍岐亭好
清夢時回嵩少遊
驛路霜催燕客騎
江門楓落楚天舟
莫論後會人難健
此日相看已白頭

病中次方鄴見寄

長安冠蓋逐時新，清秩何由被老臣。
詞賦從來同鄭衛，

時名試以詩賦

干戈猶復動滇閩，校書才力看華髮。
伏枕生涯

曠紫宸

有修史之役會病卧逾月

遙憶溪山輸穩坐，藤陰石畔好垂

綸

金明寺放生池

灌木疎篁白晝陰，重閭澤國出香林。
梵鐘聲徹魚龍醒，漁艇機忘江海深。
人靜惠莊知極樂，地幽支許數相尋。

眼前兵氣銷難盡解網誰能共此心

贈宋叔遠

黃塵蹀躞御溝頭高歌斗酒久淹留
公卿把臂不相放閭闔上書誰見收
南飛寒雁向歸路朔吹丹楓生客愁
江湖斫鱠且縱棹漫將鯖味煩五侯

和耦長移館書懷

空庭昨夜菊初殘霜白天高歲又闌
卷僻總輸三徑靜官閒何似五湖寬
詩妨人事吟成少愁滿鄉書寫盡難

咫尺素交稀見面棲遲誰得一枝安

王侍讀答耦長餉木瓜酬倡至再屬和元韻

舊貢宣州土物傳携來還帶故山烟香風似傍蘭臯坐
品目元居橘頌前幽谷華林全不改旅人詞客總應憐

同聲託好頻投報肯數何郎賦一篇

宋何承天
有木瓜賦

二

鄉心遇物重難陳手植家園憶苦辛遊冶不同芍藥贈
驛騷羞比荔枝塵壓來香汗和紅粉杖取靈根掖老人

我意惟將伴書卷
新詩一嗅一回新

學餘堂詩集卷四十

欽定四庫全書

學餘堂詩集卷四十一

翰林院侍讀施閏章撰

七言律

立春後一日陸翼王丘近夫高阮懷梅耦長過集
寓齋同賦五微

西山冉冉送清暉
一夜春雲暖翠微
客裏風光人日換
坐中耆舊帝城稀
世情鞞鼓欺書卷
鄉夢梅花亞竹扉

步屨招尋從造次旗亭燈市肯相逢

送簡謙居之右江

龍江象郡路何長嶺嶠今非瘴厲鄉南楚銷鋒諸洞靜
春風擁傳百花香濯纓鈿鈿潭還在酌酒羅池廟未荒

揮手離亭莫惆悵中朝才彥半門牆

簡以銓曹督學江南

同翼王近夫耦長集阮懷寓齋再用微字

隔巷猶嫌良會稀過從乘興笑開扉客仍舊侶歡逾永
酒問鄰家願不違新月何人吹玉笛東風幾日試春衣

他鄉朋好傳柑近燈火天街並馬歸

送王仲昭舍人

同心愁見別筵頻不分東風柳色新
官比馮唐猶未老才如王粲肯依人
交游早歲名滄海詞賦連年入紫宸
誰念平津舊賓客扁舟歸卧五湖春

送丁雁水分巡贛南

斗酒纔酣傍薊丘春風無那別離愁
滇閩烽火紆南顧吳楚山川領上游
部下論文名士在尊前岸幘碧江流

鬱孤臺畔行吟處望闕思鄉漫白頭

為馮昌間題冊

久耽賓客重文辭拜爵桓榮又一時東閣趨庭元世胄
橋門抗手稱人師談經許奪臯比坐紀事先題石鼓詩
玉樹翩翩年正少幾人却媿致身違

送張英石分巡溫處

張由戶部郎出

度支幾載意長閒何事離尊不可攀遠道春風隨劍佩
孤城天塹擁江山龍湫瀑挂登臨外鯨海波平坐嘯間

送別忽驚懷舊切憑君問訊莫愁顏

時附訊前使君高
尚季及諸游好

寄冒巢民是年七十

肯信離居白髮新
邗江畫舫憶良辰
坐論文獻空時輩
笑看漁樵逐野人
客到水園堪累日
鳥啼庭樹不勝春
能詩子弟風流甚
相勸開尊定幾巡

三月一日入直史館見玉河水色次韻陳其年

草色江南已綠茵
春流初見玉溝新
軟沙氣暖喧花鴨
太液冰開動錦鱗
才盡直廬長載筆
官驅華髮未閒身

移樽修禊家園夢倘許朝衣當酒緡

朱雪沽同年之新蔡

射策聲華重帝京絃歌廿載總專城
嶧山古洞曾題字
銅水清流好濯纓
吏隱從來多海客
官貧猶是舊書生
同儕此日晨星在
分手誰能不繫情

錢月江編修暫假南歸

馬卿消渴日思歸
南去青樽興不違
鱸膾筵開新畫舫
芰荷香滿舊漁磯
石渠授簡餘班管
宮錦承歡作彩衣

高卧遙知極目處
白雲潭上暑雲飛

張振九守順慶

清暉閣在好躋攀
蠻徼烽稀一解顏
地枕漢中元傍水
雲生江上日看山
寨帷訟少巴歌起
買犢耕深戍壘閒
舊憶張堪為政美
春風莫遣髣毛斑

送姚子遜遊東牟

歸心迢遞夢江村
旅食羈栖尚薊門
古調舊多關塞曲
窮交不忘信陵恩
過從數愛花連坐
惜別何孤酒一樽

東去滄溟看屋閣風流海客幾人存

湯潛菴侍講移寓全耦長用八齋

經年僧舍稱幽棲葦曲移居似瀼西一帶春流涼氣入
千草夏木綠陰齊空庭花鳥侵堦靜高館星雲拂坐低
河岳蒼茫森在眼過從幾輩得攀躋

夏日右安門外僧舍作

竹榭蘿軒興未忘僧廬小歇愛林塘傍籬南去豐臺近
迤迤西來翠袖長槐葉陰中誰草閣荷花好處似江鄉

柴桑蓮社依然在半醉輕風送客涼

送陳北山之南陽

僧廬相見把詩論湖海風流吏隱存此去濯纓臨洧水
舊游飛蓋滿梁園行吟驛路河聲轉坐嘯官齋夏木繁
為問南陽名士在卧龍岡畔好開樽

送陸雲士為郊令時令兄蓋思全往

邑有峨眉勝地偏到時風物正清妍千迴汝水秋林外
百里嵩雲曉幔前定鼎跡存餘王氣登臺樂奏想當年

聯翩二陸多能事應有新詩洛下傳

送陸蓋思歸武林兼悵悼亡之感

懸裝入洛又南旋驛路涼風客鬢邊
貫酒恨孤河朔飲高歌憶共武林船
人誇闕下平原賦篋有閨中錦字箋
誰信清秋游子淚銷魂重續悼亡篇

與王星南夜坐兼懷王山長廣文

長貧何日酒杯寬野饌能延上客歡
閒把蒹葭悲不語夜留詩草笑相看
畏途旅雁鄉書少荒館秋燈暮雨寒

時憶故人真吏隱，獨歌漁父滯河干。

劉井柯亭

翰林院有石井，相傳劉文安定之所鑿。柯學士潛作亭，其傍曰瀛洲。夾植雙柏、李、文正、東陽，詩所謂我行樹陰日千匝也。今井存，亭廢，亦無雙柏。惟餘老槐，感懷舊跡，和尤悔菴同年。

劉井

青瑩誰鑿水晶寒，錦石銀牀位置安。起草羣賢曾洗硯，

論文异代一憑欄宮雲近覆晴猶潤海眼潛通旱未乾
倘有泥蟠神物在那愁霖雨被人難

柯亭

仙客聯翩倚檻來丹亭曾向日邊開殘柯蔽芾猶連井
芳草淒迷舊有臺接坐共憐星聚地凌雲誰稱歲寒材
風流未墜餘陳蹟悵望千春首重回

和尤悔菴嬾朝韻

藥裹隨身騎馬稀冠纓麋鹿性長違金塵遠憶松花飯

裘敝爭如荷葉衣中歲久衰貪養拙
新恩未報敢言歸
蹢躅逐隊慚鷓鴣珥筆生涯計恐非

送張濟南式思

五馬朝嘶上苑東岱宗迴擁帝城雄
鵲華山色分簾外
日夜泉聲滿郡中杼柚民勞憐賦急
郊原雨足幸年豐
舊諳清德饒能事攬轡行歌大國風

敕賜翰詹諸詞臣鮮藕紀

恩

水殿傳呼特賜榮詞臣拜舞集承明真從太液仙源出
肯數蓮峰玉井生列案一藜冰共白堆盤千片雪同清
楓宸魚藻恩何限葵藿長懷就日情

王阮亭侍讀生日

君以閏八月廿八日
生今歲八月始再閏

石鱗墮地元秋閏今日平秋又閏年詞客名成多弟子
宮人口熟半詩篇聯鑣屢踏金臺畔弭節曾題劔閣前
手按殘篇身好健開樽早近菊花筵

送焦荆巖都諫分憲薊寧

雪霽燕山照眼新
西行千騎正陽春
漢庭特美循良傳
聖代元推岳牧臣
晉水聲名看攬轡
都亭丰采憶埋輪
當年諫草心猶壯
倘有民艱擬重陳

楊岱禎侍御分守口北

舊時驄馬重神京
屏翰寧輸諫草名
戀闕山川環輦轂
臨關旌節控邊城
千軍約束霜猶肅
三輔謳歌風自清
聖世懷柔連極塞
從容裘帶許書生

題侯仙蓓同年遺像

卷中備園亭
歌舞之勝

螭廷射策憶同攀半世星霜悵別顏粉署聲華傳北闕
中年絲竹滿東山梁溪花發園林美龍岫泉甘尊酒間
勝事祇今回首在不禁老眼淚痕斑

王北望視學廣西

香風入桂舊氤氳花樹冬春渾不分烽燧久稀從習禮
臯比坐擁一論文瀕江水灼千崖石獨秀峰浮萬嶺雲
荒服無難變鄒魯使君家學況河汾

白少谷令故城是東谷尚書之子

門望先朝誰復過相逢燕市一高歌酒尊彭澤閒心寄
詩卷香山舊日多捧檄地元分渤海濯纓官好就清河
澹臺故里間猶在人士風流定若何

嚴奕肯令建平

鯉湖仙客愛滄浪清澗春流遶縣長入境野田多秣稻
近吳風俗半蠶桑雉馴原隰依人慣花滿山城拂綬香
握手青門情倍切敬亭百里正相望

偶遺阮懷檢討氍毹枉詩為謝笑有此作

客夢初回積雪天，欲眠不寐意難傳。
千春俯仰催雙鬢，萬事經營剩兩拳。
僵比袁安曾獨臥，寒知江革舊相憐。
何時抱得顏如玉，暖老全勝一束綿。

附阮懷詩 歌枕更殘欲曙天，淒涼情事苦難傳。
蠅行泥上身常屈，鷺立沙邊足每拳。
穿榻昔聞高士卧，割種新得故人憐。
竒温昨夜初生被，絕勝吳蠶幾葉綿。

庚申長至日後憶及內子李宜人以嘉平月望五
十初度率成一詩寄之

早膺鸞誥亦稱榮，嫁得黔婁却累卿。
逮下真誇螽羽德，

還山久共鹿門情
脫簪客饌親勞苦
失母孫雛賴長成
好待老夫偕隱日
持觴莫遣鬢華生

聞孫予立編修將入都志喜

春明一別歲將闌
計日驅車天正寒
心切早依丹闕近
夢魂猶戀北堂歡
江城畫舫霜前發
岱岳晴峰雪後看
客路應多詞賦好
舊游相望滿朝端

馮相國生日同諸君移尊長春寺讌坐

公即席有詩率爾和

韻

金方...
卷四十一
海岱人宗屬望先花宮喜得早梅前綸扉一代推元老
文字三生共宿緣愧比應劉容接坐身隨李郭是登仙
忻逢初度成高會况復昆明奏凱年

惜書和錢宮聲韻

伏枕三秋黯自傷况當儉歲減倉箱破顏恨少盈樽綠
老樹驚看落葉黃書籍久拋從脫手丹鉛難割幾回腸
生涯蠹簡君休問贏得新詩滿一囊

緒冬月望早朝

是日立春

曉漏初傳鐘鼓喧
彤墀仙樂奏雲門
烽銷萬國瞻
天喜
虎拜千官荷
聖恩霽日春回初
獻瑞和風拂面早知溫
似聞遊豫迎陽氣
五柞長楊候

至尊

高念祖以曹秋岳侍郎贈詩屬和漫爾用韻並柬

侍郎

漫須斑管架珊瑚
袖裏長懷五岳圖
舊業藏書窮禹穴
層峰躡屐到天都
篇章誰識曹劉好
京洛曾逢李郭無

留滯經年休悵望不妨高枕作狂夫

君嘗游宣歙諸山

二

客夢家山鴛水遙鳥飛繞樹影蕭蕭烽烟戰伐關愁思
文字招尋未寂寥月色醉歌燕市酒詩情閒在灞陵橋
歸逢者舊憑相問應詔何嫌上赤霄

謂曹秋岳侍郎不應宏博之召

既收成都聞秦人言川陝事

時秦人轉粟抵成都一石價廿餘金

禁旅初通蜀道年捷書昨夜報甘泉

九重推轂籌先定六詔投戈檄可傳飛棧連雲成白骨

盤山轉粟上青天秦民共憶憂方切側首西風一惘然
客每稱予視學山左舊事有感

東土論文廿載餘何當垂老被嘉譽守官冰雪心元苦
相馬驪黃術恐疎尚有齊風徵大國可能魯壁間遺書

閒來側首長懷古比跡河津媿未如

薛文清嘗
督學山左

送范平萬歸寶應

汗漫何曾學比丘清齋高論自風流園林久愛湖邊好
書卷閒隨闕下遊垂老夢飛還五岳及春吟好且孤舟

看君剩有清尊興歲儉江田秣可收

寄題李躍淵參戎像

仗劍塵埃自致身鬚眉直擬畫麒麟
知幾關隴先歸客敢戰滇閩不死人
躍馬風馳猶習禮還家壁立未憂貧

誰憐歲晚尋朋舊旅困天涯一愴神

君訪舊粵
西道病卒

王恕行宰桐城

談經東國舊心期綰綬風流好在茲
畊獵山家供賦稅琴歌部下盛文辭
浮峰花發行春日皖口雲隨入郡時

欲識此中遺俗厚到今朱邑有專祠

召見乾清門

入直長趨丹鳳樓忽驚咫尺覲

宸旒未遮宮扇瞻天近不散卿雲繞日浮

帝德難名深氣象

主恩蓄意待咨諏心懷董賈才何有奏對誰當第一流
送孔心一分守羅定

西曹風義舊難忘晚節重臨百粵鄉攬轡荆南多宦蹟

行春嶺嶠足篇章烟開桂郡連峰遠雨入瀧川漲海長
自喜遐陬饒藥物丹砂看試養生方

答博問亭留別

時送祖母太夫人
櫬歸葵遼陽

旗亭別緒日紛紛君去含情悵白雲出塞歸鴻沙際落
臨關哀笛夜中間天山地凍花偏晚邊雪春深路未分
誰信王孫正銜恤重將尺素念離羣

送桐君和春字

薊北離亭送客頻相看斑鬢復殘春百年生計多行路

午夜歸心繫老親不見花開能勸酒何當鳥語解留人
秦關近報烽烟動卧穩江潭敢厭貧

馮相國上巳日招集萬柳堂限韻

柳送春來又一年帝城園近勝遊偏蘭亭水榭依然在
兔苑風流自可傳曲檻故留雲去嬾叢花不待雨催妍
西南解甲從觴咏高處閒看萬井烟

寄半字

齋居迢遞帝城西逕滿苔痕嬾杖藜冷寺春陰惟樹綠

荒村雨散倘鶯啼看殘貝葉親茶竈饌美葵羹就菜畦
正是江南櫻笋候長干能忘舊招提

馮相國枉謝綠雪茶兼索新者走筆奉和

軟揉碧玉作仙茶雀舌親收雨後芽桑苧經營情較癖
文園消渴興還賒近虛名椀慙留客遠隔雲巒苦憶家
佇待江舟愁報晚何當句好赤城霞

王恂度以明經自楚入對不更謁一貴人以母老

造歸得一詩送之

先朝遺直有間孫
江漢風流詩卷存
鄉夢祇懷三徑竹
貴游愁向五侯門
寧親饌美將魚膾
送老吟多坐樹根
赤壁磯頭歸棹遠
更期何處共清樽

其曾祖諱惟允
萬歷朝名臣

瀛臺引 見

禁林沆瀣有神洲
宮殿巍我在上頭
靈沼不勞歌聖德
昆池習戰讓宸游
虹橋畫舫波間動
綠樹青峯檻外浮
間道甘泉新獻捷
共忻魚藻

主恩優

比干墓

積蘚殘碑峙廟門何人捫讀為聲吞宗臣不死終遺憾
荒墓雖封轉斷魂六百祀亡偏俎豆千秋血諫總兒孫
可憐劫火難銷盡尼父留題字尚存

大梁試院中秋夜同劉怡齋吏部

汴宮遺跡舊淒清永夜論文露氣生忽見月圓知令節
誰禁歌罷動鄉情閒從河畔看銀漢遠憶江關歷鳳城
池白渾疑梁苑雪共君拚把玉樽傾

贈別同考諸君

鄴下詞人會聚難
辛勤旬日接清歡
相知懷抱然疑絕
苦愛文章慘淡看
合坐風簾摧燭短
倚樓秋月照人寒
金門握手前期在
惜別芳尊興未闌

重過睢州湯潛菴侍講宅

十二年前舊草堂
到時風景又斜陽
官歸禁苑家如昨
屋老藤蘿壁盡蒼
遂隊一時同筆札
論心晚歲感行藏
北來南去應相見
無那離愁轉客腸

君時主試
浙江將歸

學餘堂詩集卷四十一

欽定四庫全書

學餘堂詩集卷四十二

翰林院侍讀施閏章撰

七言律

孟冬朔旦塗中作

是日例祀太廟頌歷

拂曙和風宿霧消
回瞻直北鳳城遙
五更遊子懷前路
三館詞臣賦早朝
盥薦衮衣親俎豆
詩歌清廟奏
韶鵷行舊憶承恩日
玉歷初頒下赤霄

宿雙溪舊館

時哭先叔
父殯宮

使節初回感舊遊
荒園無恙帶溪流
一林竹木猶青靄
三仕風烟早白頭
殘蘚半遮題字壁
暮雲爭擁讀書樓
趨庭拜墓餘雙淚
雨榭風亭叢桂秋

劉蘧庵舍人書至

關情千里意何如
雪夜燈前細作書
書省苦吟從寓直
高臺極目悵離居
山園入夢家仍遠
星使還鄉計已疎
聞道北堂身轉健
朝朝含笑進江魚

池陽經望華亭

九子峰開碧玉林五溪亭上好招尋
早霞隱見仙樓出積雪淒迷山寺深
短髯星霜還策駕多時猿鶴勸抽簪
憑闌舊憶經遊處曾踏東峰第一層

重宿依水園

孤城穀水暮潺湲傍渚開軒杳靄間
溪老漫題石壁去野雲時上竹亭還
新添曲塢穿巖入醉許沙鷗與客閒
往日主人情爛漫倘應飛夢到家山

寄淳湖邢景之

雙魚斗酒憶招尋
回首俄驚白髮侵
南北風烟難見面
湖天雨雪重關心
長途車馬生涯薄
晚計蓴鱸歸興深
苦歎交遊成汗漫
故人良會轉蕭森

訓蔡龍文兄弟假館

幽棲野性愛長干
招我如君兄弟難
交豈忘年稱小友
飲同十日罄清歡
江淹宅畔論才富
周處臺邊感歲寒
猶記嬾園荒徑在
殷勤懷舊雪中看

再酌金長真按察署齋

程穆倩黃
仙裳在坐

清尊曲坐興遙飛
紅豆歌殘夜漏微
執法不妨文字飲
當筵時有芰荷衣
官添華髮音書遠
客渡黃河雨雪霏
不是使君真惜別
秦淮投轄故人稀

聞喬石林編脩補粵西主考

虞廷干羽靜牂牁
八桂徵才太史過
拂憶鶯花春日好
憑軒嶺嶠

主恩多星巖壁辨
仙人字柳廟碑看
荔子歌手闕荒榛

金史四庫全書卷四十二
收竹箭木蘭船下洞庭波

高郵除夕

不信流光逼歲闌
江城此夕試春盤
壯心強半消行路
鄉思無端數倚欄
侍從漫稱陳力短
文章何物報

思難得魚研膾
供名酒欲頌椒
花醉嬾看

贈孫忞庭少司馬

舊好誰憐會聚難
華燈永夜接清歡
文章共信知音少
出處閒憑醉眼看
雲捲岱陰孤嶂直
風高齊水一春寒

時平正切蒼生望應念東山老謝安

林澹亭視學河南

先是主山東試

論才海岱一登臨回首中原攬轡吟上國文章皆在手
東京風物有遺音龍門絕壁雲常起兔苑荒臺蹟可尋
策馬舊遊無限意黃河春水向人深

表弟杜詩字李齊新補諸生索贈

本姓陳建文時死難尚書廸之

裔也杜女適陳有姓歸寧得脫於難

名齊李杜竟誰期愛爾昂昂策足時腹笥應窮千古事

家聲莫倚數篇詩，才稱早慧論文細。世本孤忠晦跡悲，待躡青雲揚祖德。先題姓字九重知。

送陸翼王

春燈夜月共高歌，大陸才名誰復過。自有公卿能結轡，肯拋林壑換鳴珂。牆東避世徵車重，篋裏鈔書秘本多。作客郡齋仍邑里，五湖烟棹興如何。

三月三日集萬柳堂奉和馮相國原韻二首

別墅城東竹石幽，翩翩佳客集羊求。隔年又值花朝節。

脩禊重呼酒伴遊
疎徑移將新柳種
回溪時有斷雲畱
平沙細草春無限
漫說青青杜若洲

二

飛花不厭入春觴
故遣羣芳面草堂
翠竹夭桃共烟雨
鷗眠雀啄自林塘
坐看雲際浮蘭榭
行憶天台度石梁
但使江流通畫舫
何妨尺水傲三湘

趙閻仙視學江南

春來杜若滿芳洲
按部論才是勝遊
書卷閒看青嶂出

臯比坐對大江流山川南國遺風在人物吳都一賦收
倘過陵陽能駐節敬亭雲鳥足淹留

四月八日奉和益都相國萬柳堂及放生池元韵
池上吹來楊柳風好花猶剩數枝紅崖禽故繞芳叢亂
水樹初含暖日融浴佛會邀鑾禁客尋山人是鹿裘翁

香厨共試青精餈緩轡追隨野興同

江南浴佛日
俗用青精餈

二

爛熳頻過花信風早霞晴射一溪紅閒思高論尋支遁

倦把清尊笑孔融，生計甘隨抱犢子。道心久許放麈翁，
乞歸未遂行藏得。魚鳥親人濠濮同。
是日齋且有放生之會

送饒與立歸寧邑

夾路垂楊送客歸，藤花竹葉繞巖扉。絃歌彥會存吾道，
生死交情見布衣。乍聚燕關重款款，行經闕里定依依。

雞山石室多耆舊，童冠春風願莫違。

時為所親收骨南旋

駕謁

諸陵恭紀

焱戈息燧武功成大祀
遄飛警蹕聲海立魚龍
瞻彩仗
風馳虎豹避霓旌
橋山弓劍元
靈寢豐沛歌宮自

舊京到處題詩聞駐
輦時時賡和徧公卿

二

遙瞻長白薦清芬
沙漠宣威擁六軍
部落銜恩千帳肅
靈祇祝聖萬山聞
行邊競奏銑歌曲
獻賦還成羽獵文
雨雪何須咏黃竹
旌旄鐘鼓樂吾君

三

龍媒萬騎出 天閑騰踏雲沙更雪山擊虎合圍供 御

饒射雕雙落動 龍顏已昭 聖德來重譯共凜兵威靖百

蠻間說 堯仁憫流戍佇看解澤灑人間 駕幸烏喇憫其地
荒遠欲罷遣流人

罪

四

安邊綏遠奮長驅王氣扶輿拱 舊都萬里山回龍虎踞

諸陵雲護鬼神趨封章乙夜揮 宸翰 御覽奏
疏三曰一發 扈 駕前

星式壯圖 東宮從
大駕 鳴綠松花巡幸處文成五色滿平蕪

壽靜若少叅之涼莊鄔嘉賓僉事之永昌

離亭曲宴對榴花半醉分襟白日斜壯齒歌呼憐薊北
蒼顏兄弟各天涯隴山關塞冰霜早洱海風烟驛路賒
叱馭王程應努力星軺指日聚京華

李閣學原庵得假奉母夫人歸里

乍離丹陛向滄洲風義從來第一流報國蠟書傳闕下

全身虎口寄壺頭時平蔣逕呼朋入親健潘輿選日遊

手撰南陔調膳得海門遙指羨歸舟

壺頭地名

二

宅傍青溪足嘯歌白頭重喜見滄浪宮衣晉錫君恩重
海錯登盤子舍多天送涼風輕鷁舫詩傳舊草在鑾坡
追隨鳩杖歡方永回首長安奈遠何

送林石來舍人冊封琉球

東南海色遠蒼蒼萬里風帆接混茫錫命殊方還帶礪
共球屢世效梯航璽書氣壓蛟龍靜蜃閣光連島嶼長
莫畏波濤苦離索王程先喜到家鄉

孫玉京令衡陽

洞庭南畔碧天長，擊汰風生杜若香。
帆過清湘先見嶽，人逢回雁一思鄉。
拄峰雲護元仙窟，石鼓苔深舊講堂。

努力甘棠延世澤，黃門肇跡本衡陽。

君尊甫都諫公起家衡陽

白子常歸江寧

故人仲調廷評之子

良會翻成握手悲，涼風初發送歸時。
耽閒自愛遊山賦，銜恤來徵有道碑。
獨臥精廬邀月夜，窮交兩世感心期。

五侯門外多車馬，何似青溪把釣絲。

時為其先廷評乞墓碑

苦憶二首和尤悔庵檢討

苦憶滄浪亭畔好眠鷗浴鷺傍堦時半窻綠蔭開書卷
片石閒容把釣絲桐雨微聞人却扇荷風入坐客銜卮
西軒復有秋蘭在花箭新抽第幾枝

二

臨溪小築憶茅茨長夏松風枕畔時坐久晴沙翻錦石
詩成細字寫烏絲藤根搯就充書架楷癭剝來作酒卮
回首此時誰稱意鷓鴣夢繞舊桺枝

萬柳堂合餞益都相國卽和元韻

離筵列坐蔭長楊拂拭秋風未作霜地勝那禁成別路
交親何處是他鄉清暉照客孤亭滿綠蟻浮杯曲浦長
無奈驪歌惟痛飲不妨爛醉賀知章

二

四坐笙歌意獨閒詩多漫興不須刪綸扉舊有林泉夢
仙老長留冰雪顏落日難拋頻會客浮雲遙接故園山
從來出處關朝野千古風流碧水灣

杜閣老子告歸寶坻

漫說耽閒憶故園 兩朝艱苦答宸恩
抗爭平準危言在

時諫止閩粵
王尚諸事

慎惜繁纓正氣存
迷作舊承工部格
風裁

絕峻李膺門言歸杜曲青山近
回首綸扉戀 至尊

二

賜宴移來病榻前 溫綸維繫意纏綿
聲名徧歷諸曹好

恩遇深知一老賢 千仞孤標真拔地
片言忠鯁乍回天

憐予舊是龍門客 立馬青門祖帳邊

正月十四日以公
不與昇平宴特賜

之私
第

玉書表第五十

尚憶嬉遊總角年，弟兄今日季常賢。
枕溪春漲浮朱檻，傍郭梅花照客筵。
案舉鴻妻身未老，庭看驥子樂當前。
一觴遠致三千里，夢到澄江水閣邊。

送袁敬亭侍御視鹺兩淮

爭傳如虎殿中身，持簡持籌寵命新。
財賦東南半煮海，都亭風義見埋輪。
蕪城染翰餘清興，月夜吹簫定幾人。

誰念古今佳麗處高門大賈總家貧

益都相國夫子予告歸里奉送四首

黃閣辛勤一紀餘 溫綸寵錫遂閒居
登臨永日身辭杖 卷軸連車手校書
半世神仙借公輔 平生懷抱滿樵漁
傾城出餞圖難盡 千載何人說二疏

二

吐握心期世絕倫 漫勞賓客擬平津
魯鄒文學歸遺老 海岱風流復幾人
一望門牆見模楷 得親色笑總陽春

東山載酒過從數只恐難閒理釣緜

三

買山杜曲興縱橫朱邱先營綠野城密柳茅堂容乳燕
繁花烟雨過流鶯吟連尊酒應劉集歸去家園海岳清

二老高堂晨夕近肯輸洛社數耆英

謂高司寇念東太史唐濟武兩先生

四

深衷開濟老臣謀合德綢繆

聖主憂 禁苑獨遊酣御釀苑

上獨命遊瀛臺禁賜酒饌飲酣

宸章三錫

重天球

御製送歸序詩及銀章

還山有使詢黃髮屢疏言歸未白

頭重荷

殊恩應戀

闕回看西北是神州

偶過張武承編修有作

帝里張華舊宅存草堂秋色自山村
臯比坐擁公超市
蒿逕深閒仲蔚門弟子半收天下士
詩書憑送手中樽
高齋退食多清暇倘抱遺經共討論

寄夏蒼壁

黃葉秋寒下碧梧
雙魚細札感潛夫
田園自釀樽常綠

松菊親移徑未蕪捧檄仙臯曾入楚構書蘭舫舊過吳
不知別墅高齋裏能見瑯琊海色無

贈劉徵士

被褐居然國士風論才意氣為誰雄
匣藏龍劍塵埃下宅傍江山客夢中
自笑燕遊同郭隗偶因讀史愛倉公
漫言挾策不稱意石鼓詩成在辟雍

和彭羨門編修偕悔菴忍菴華隱諸同年夜集寓齋之作時壬戌除夕前二日

素交簡易共心期
小坐偏宜歲晏時
比舍客過常步履
趨朝髻改漸成絲
書多閒許披帷借
路近歸從把炬遲
三徑逢迎元我輩
風流應遣後人知

二

老嗔歲短恨更長
苦憶梅花傍酒香
夜煖一冬無雨雪
官寒五載飽風霜
簡編送日生涯薄
車馬看人底事忙
永夕偷閒差不惡
儘拚清話舊山堂

研山自山左巡撫簡督兩淮賦此寄送

玉尺冰壺輦上間吳山魏闕又遙分海邦已沛岱宗雨
幕府重開天目雲談笑恩波深兩湖旌麾節制靜諸軍
名兼管葛吾儒事努力行看答 聖君

二

去年燈夕共更闌火樹銀花爛醉看此日漸知旌節遠
何時相見酒杯懽論文賓從湖山美秉鉞風霜鈴閣寒
老我倦遊搔首劇西陵春水路漫漫

壬戌上元予過濟
南卜夜留懽極華

燈烟火
之盛

吳大宗伯賡庵入閣

朝聞 錫命五雲飛
江楚聲名此日稀
舊擅文章雄虎觀
新叅密勿入綸扉
禮闈典重頻專席
講幄年深數 賜衣
已奏昇平還借箸
匡勦端不負恩暉

二

彤墀拜舞領千官
吐握還傳賓從歡
伊呂嘉謨陳 御坐
夔龍雅望擁朝端
勝遊海嶽心期遠
彥會壺觴禮數寬
猶有舊時同籍客
拂塵倘肯一相看

同年八百人
公始入拜

追悼李石臺侍講

相違信宿悵離羣，忽漫經年袂永分。
禁苑薄遊曾並馬，

夜臺誰許共論文。魂傷燈市春宵語，愁黯江天日暮雲。

闕下鷓班接坐處，幾人款款復如君。

辛酉上元招予出遊，忽把手曰：恐此

樂不再

二

豈真吾道困龍蛇，匝歲賢人屢痛嗟。

先是二月哭陳其年檢討藜閣

校書勞永夜，星軺懷古弔長沙。

典試楚中

一官沒後猶蒙謗

百折生前久破家

聖主知臣臣不恨莫教泉壤淚如麻

和徐大中丞除夕詩用韻

金門時憶舊郊扉荏苒風光勸拂衣守歲無心長少睡
還山未果媿言歸春盤倦續椒花頌鄉味携來菘米肥
京華燈觴多勝事相看只恐髻毛非

時傳上元節
將賜宴觀燈

二

遣興時時倚舊醅欺人日月苦相催忍看眼底拋殘厯

忽夢江頭入早梅晚節久安生計拙春風遠接故鄉來
論文稍喜存知已午夜重傾竹葉杯

送袁杜少假歸省覲

客中不分送歸頻却羨高堂戲彩身子舍尚分官釀酒
板輿猶及故園春別時弱柳牽愁早中路繁花照眼新
垂老校書應念我獨將蒼鬢受淄塵

贈蒲陽湯素公別駕

經術元推漢大夫平生家學重東吳交情道合雙龍劍

仙吏風清九鯉湖海嶠恩波沾蛋戶文章涕淚涌鮫珠

在郡有
存誠錄

爭傳折節收耆舊下榻畱歡定有無

謂高雲客
余全人諸

子

寄李含露總戎

雙魚千里問加餐短札長畱懷袖看地控重關真接塞
風生萬馬獨登壇行邊雪後旌麾遠校射春深貂錦寒
回首潺潺濟水上持螯把酒罄交歡

周星公使安南

玉節遙臨絕徼長
春卿特使擁輝光
路逾滇粵蠻方盡
帆過沅湘杜若香
聖世同風銷戰鬪
儒臣載筆總文章
跼蒿炎海休惆悵
白雉行看貢越裳

學餘堂詩集卷四十二

欽定四庫全書

學餘堂詩集卷四十三

翰林院侍讀施閏章撰

五言排律

過洞庭湖

春半洞庭漲風驅萬櫓開蛟龍橫楚粵島樹割蓬萊軒
帝乘雲去湘妃鼓瑟回白蘋鷗浩蕩芳杜水滌洄蜃市
朝曦暗珠帆夜月來氣連南嶽霧濤駭北溟雷天地滄

洲盡江湖畫角哀中宵呼屈宋千古一裴裒

穀雨日集太函山房試茶

先一日大雨

春風偏愛客穀雨一朝晴雀舌看初吐龍團摘旋成色
涵潭水白香奪畹蘭清謾謾松喧坐娟娟花繞楹茶經
翻陸羽酒伴召公榮鳥向鏡中語雲從杯底生藤深蟠
曲磴樹老出高城不盡登臨意重含海嶽情

山陰贈張登子

步屨過從慣園林讌集頻乞泉分玉帶

泉名

携酒坐花茵

弱冠思游洛英詞擬過秦官居滄澥郡恩到日南人逸
興青雲發閒心白社親歸來檻水曲大笑桃源春一研
堪雙壁千峰是四鄰牀餘王氏笏名重郭公巾金谷花
無數蘭亭書絕倫苦吟不暇嬾好客豈知貧濩落年猶
壯騫騰志未申情知戀絲竹豈合老松筠

蕭山黃開平別業同諸子賦

山堂臨北幹好友共相求籬徑開叢竹圖書冠九州海
門時騁目江嶼坐消憂投轄星辰聚臨窗河漢流巖陰

藏短榻木末出層樓細雨池臺綠回颺洞壑秋雲連秦
望樹潮送武林舟疎酌偏成醉高言不易酬才傾鸚鵡
賦狂典鷓鴣裘兵革身將老風騷志未休漁蓑烟際沒
水寺掌中浮宇宙誰青眼滄洲許白頭湘湖蓴正好禹
穴字還留客選蘭亭勝人堪蓮社收棲遲心不厭貧賤
性難柔朱果呼兒摘新醪向婦謀情閒鷗鷺靜歌罷鬼
神愁杜甫詩難盡重過何氏游

除服北征連值雨雲回憶粵西遭亂有述

出門云歲暮魏阪苦攀躋跋涉窮川陸關山歷宋齊朔
風吹短鬢積雪斷荒蹊行止何蕭瑟親交念解携憶從
碣石北遠使洞庭西浩蕩經三楚艱難過五溪嶺雲橫
漠漠江樹暗淒淒路險騰猿泣林深怪獸啼城池驚虎
豹肝腦遂塗泥白日忽已匿青天不可梯存亡爭頃刻

向背失端倪

先是奉使廣西
值桂林城陷

符節衣重裏餽糧手自齎

直疑罹網雀翻悔觸藩羝烽起霾霄漢魂歸怯鼓鞞
袍供盜賊枕席付蒿藜僕作蠻鄉塚身爭水鶴栖倚閭

空絕望

是歲祖母卒於家一僕死桂林

問道苦長迷令伯私情痛王陽

夙願睽三年苦苦塊萬里怨輪蹄瑟瑟河流凍遲遲岍

草萋長安愁索米驛館聽鳴雞莫訝吟詩瘦天高騏驎

嘶

送孫平侯守平樂

萬里昭潭路雙旌去杳冥瘴雲連洞黑錦石倒江青城

市龍門驛官衙天繪亭異泉流感應

泉名

幽洞駐仙靈山

色朝還暮灘聲醉可醒人家巢絕巘榕樹幕空庭樸俗

安良牧殊方寄客星相如能諭蜀早晚達朝廷

諸尚集賈園

侍御張雪對孝廉王白虹陳
玄公共錦雯嵇叔子張旭之

謝公愛丘壑別墅勝崖居况復良朋集兼之野性疎園
亭紛窈窕樓榭上清虛雜蕊辭柯後紅榴照眼初西山
來几席碣石走林廬近坐藤為榻當軒柳覆渠頻傾白
墮酒小摘杜陵蔬雲霧生衣袖星辰落綺踈論交歌寶
劍拚醉解金魚過雨葡萄綠微風荷芰舒忘形從醉醒
高話及樵漁它日相思切加餐有素書

奉贈學士方坦菴先生

今代詞場客惟公號宿儒寸心惟簡易五字肯榛蕪折
節收時輩新聲屈小巫誰言今老大隨意總歡娛侍從
前朝舊文章此日須衣冠黃綺在經術董劉俱汗血皆
龍種生毛並鳳雛談遷聯史閣元凱競天衢幔捲雲依
檻庭閒花滿株養分光祿膳客醉步兵厨含笑看斑彩
高吟廢杖扶異書橫短榻勝氣拂長鬚北牖眠瀟灑西
山翠有無閒來飼魚鳥興劇滿江湖好盡樽前酒滄洲

趣不孤

送孔心一比部出按江南

華胄來洙泗聲名動
闕廷秩宗曾典禮秋署舊明刑持
斧仍兼綬懷瑜本六經蒼生需雨露白簡掣風霆吳會
此何幸淮徐方就寧征輸膏血盡鞭撻訟庭腥城社容
狐鼠苞苴失涓涇波頽詎太激衆醉故宜醒送遠愁分
袂同曹憶聚星新詩嘗好我未議倘能聽雲樹山川秀
江湖天地青龍泉今在掌斟酌試新硎

夜集劉何實員外

客來能不速下馬即登堂復此簾前月同傾花下觴風
吹禁爛漫香細得微茫雲漢影俱淡江關思正長小僮
森玉樹妍唱繞雕梁曲和朱絃奏歌翻白雪翔纏絲今
夕酒淒斷百年腸努力念知己素心安可忘

贈劉侍御按上江

柱史聲華著江南形勝偏 絲綸街 紫禁斧鉞下青天八
郡瘡痍日三吳烽火年官元是鸞鳳公豈效鷹鷂竹箭

收應盡江籬坐可褰帆開揚子驛山躡敬亭巔露灑窮
簷急澄清抗疏傳淵魚誰照燭禾莠慎陶甄道自朱絃
直心從白日懸陳情同野老萬一使君憐

呈劉大司寇

嵩嶽蟠中土英靈盡八荒碩儒真間出哲匠獨昂藏蚤
領冬官秩俄登秋憲堂是時嚴令甲觸目滿桁楊擊斷
心頻折平反淚幾行高門追定國解網佐殷湯禮數官
曹略詩篇接引長感恩余獨厚知己義難忘元氣收河

洛雄才挾混茫佇看親
御幄拜手頌時康

上內閣金相公

公見予舊詩謬辱
獎許故獻是篇

鳳闕名偏重龍門跡未登
如何下里曲翻動郢人稱
亮直和僚省冲虛接友朋
夙懷鴻羽漸重賁鶴書徵袍笏
烟雲具行藏社稷憑筆濡
仙掌露心濯玉壺冰匡救思

無數委蛇力倍增

楓庭恩繾綣麟閣貌峻嶒

禁中嘗
畫公像

勅使頒宸翰從蒐賜角鷹朝成三殿賦
夕侍九華燈制策
天人盡司衡元凱升韞藏知玉石并水辨
淄澠銘坐惟

居易懷瑜更去矜盤傾皆白豆路險獨未繩綜核勤圖
史休容泯愛憎桐陰當夏綠山色向秋澄問字投揚子
憐才仰信陵倘能攀羽翼延頸望鷗鵬

送薛行屋宗伯還山

拂衣謝燕市矯步還嵩高出餞傾三輔思歸動六曹思
榮今賀監賦頌舊王褒令子龍門貴傳家郢雪操洞門
餘石髓巖霧裛金桃紫蔓褰春服黃鸝勸濁醪義農從
白首天地且秋毫他日尋王屋重披仲蔚蒿

焦石虹侍御園林夕晏

女郎山色好對此辟疆園落日下高樹主人開東軒口
街北海酌興盡滄洲言種藥各成圃疏泉深得源蒼藤
依石丈紫籜解龍孫繞屋衆芳積穿林孤鶴翻女蘿信
繾綣叢桂難攀援延賞一長嘯思歸江上村

邗江贈關中孫豹人

聞爾羈棲久同嗟見面難未成歸渭北却喜聚江干尊
酒能相就新詩許獨看揮毫心卓犖倚劍意辛酸遁跡

摧雙髻憂時集百端
秋燈青耿耿夕露白漙漙
任婦謀雞柵呼兒補藥欄
困餘惟筆研狂或廢纓冠
散帙連牀滿論交二仲歡

雷伯翁
王築夫

校讐良慘淡風議自波瀾
共慕魯連義休為馮缺彈
逢君同慷慨持贈瑰琅玕

荅關西李岵瞻進士

有登華
嶽詩

有美西秦客清歌正始存
雄心侵北地側目向中原
繪事丹青絕交游燕趙繁
彤庭傳射策白社對傾樽
氣挾黃河注峰攀華嶽尊
風烟開莽蕩日月鬱飛翻
安步蒼

龍峽高吟玉女盆，洵難窮耳目。直欲小乾坤，浩浩經淮
甸。悠悠歷海門，一身衝積雪。萬里悵歸魂，怒與蛟龍鬪。
羞同燕雀喧，艱虞留縞帶。磨滅慎晨昏，止酒銘庭訓。
君飲

酒有
定限

憑詩省淚痕，過從常夜月。披豁共朝暾，俗士矜雙

壁。高人重片言，看君飛動意。應化北溟鷗。

庚子冬暮歸自廣陵阻風述悶

倦客停橈久，羈心野望長。川塗仍故國，舟楫自它鄉。
飄泊慚妻子，逡巡犯雪霜。山船深坐井，泥岬滑緣牆。逝矣

從迢遞悠哉入渺茫石尤風悄悄江浦雁行行
蛟室迷津轉客腸海陬猶甲盾水戰習餘鯨
島嶼黏天碧藤蘿覆石蒼書囊成几案藥餌代
餼糧遠棹聞巴曲高懷值楚狂物情爭慘淡
吾道任昂藏飛塔浮雲外孤烟獨樹旁
掠波憐翡翠眠渚羨鴛鴦憶昔螭頭賦曾充
粉署郎年方逾賈董名或擬班揚斗酒燕臺
醉微吟郢雪翔星輅趨五嶺雀舫過三湘
箬人蠻居黑花寨徭洞香加餐憑蕙苾駐
馬憩枕柳遠媿張騫使虛傳陸賈裝

崎嶇連鼓角，騷怨付篇章。已識驅馳倦，誰言筋力強。推
遷為外吏，隕越懼康莊。畏俗懲辛螫，謀身類跋狼。艱難
踈舊好，束縛懶詞場。蓬鬢風塵改，家園松菊荒。殘生違
皓綺，往事悼膺滂。戢影看宵月，銜思送夕陽。三山餘繾
綣，六代總悲涼。出處終何得，漁樵未敢忘。題詩伴朝夕，
晞髮近滄浪。

頻過楊仲建留贈

宣城北界黃池
有楚王城舊址

楚王城畔路，草閣壓寒濤。身老漁樵健，妻賢井臼操。冰

天烹紫蟹夜雨竭香醪愛客性能直長貧心不勞池魚
供歲月林館蔽蓬蒿家世詩名舊

君曾祖老癡先生以詩名

烟霜野

與豪清鐘來水寺落葉滿江皋不厭相過數時時繫小
舫

壬寅五月四日臨江官舍作

去年此日自湖上薄游歷天竺靈隱韜光諸刹窮幽
極險所至尊以寺僧客皆不能從焉夜坐韜光飛雨
閣得詩九首意不可遏會大風滅燭而止高枕萬山

但聞風雨不知其為金蓮泉響也回憶斯游便欲乘
風奮策矣

今朝何逼側昨歲太騫騰酒厭湖干醉山尋天竺登林
峰頻出沒海日迴憑陵窈窕塵囂遠空濛黛色增輕身
同鳥捷峻嶺似猿升徙倚三生石攀援萬歲藤洞門雲
靉靄樹杪峽奔崩靈鷲飛將去玄猿呼欲應諸天真咫
尺巍利疊峻嶒新若全烹雪寒泉不讓冰興移無可歇
心賞遞相仍細路迴千折危岡上百層窟深穿虎豹松

老掣鷗鵬寂坐天香發孤吟夜氣澄狂夫矜彩筆山鬼
妬明燈風雨纏樓閣星辰逐寢興從游希健客留偈別
高僧放浪誠何有冥搜得未曾至今思躡屐猶自夢擔
簷竒岫宜披豁荒城苦鬱蒸艱虞情驟減跼蹐恨難勝
絲竹違安石蓴鱸劣季鷹漸添霜入髻那盡酒如澗會
去觀滄海重題繼駱丞

范魯生書至却寄

時舍弟
受業

別久兩相望書來水驛長新詩緘累幅短札字千行事

往頻回首情多忽斷腸把杯陪畫舫祖道感河梁花想
寒梅下軒開盧橘旁獨吟安石几散帙滿蔡牀疊嶂朝
生爽雙溪晚送涼周旋從簡易搜討破微茫薄宦今何
有窮檐卒未康向人真慘淡得句復猖狂病遣楊枝去
愁馮竹葉嘗教兒粗識字憶弟倘升堂世事漸磨滅生
涯迫老蒼蒺藜歧路仄蘿薜故園荒瘠壤仍凶歲孤城
近瘴鄉終當歸草閣一醉舊滄浪

蔣虎臣修撰示近詩得十韻

篇章何汗漫把讀轉酸辛
卒歲長為客新詩半哭人
艱難經浩劫清淨想前身
貪善無虛日尋僧不隔晨
行當歸禁苑何事守江津
病采三茅藥羨思千里萼
悲來時有淚痛定竟無嗔

君自號無嗔道人

無

簡易安貧久纏絲念舊頻

幾時重見面一飲共經旬
湖海風波濶看誰穩釣綸

諸賢重會白鷺洲三日

時講學言及孝弟有聞之流涕者

鄒魯微言遠東南墜緒傳
不徒憐契濶復此共周旋
修渚橫江出高樓切漢懸
衣冠空郡國耆舊儼神仙
辨難

毫芒析昭融同異捐道存言簡易心動淚潺湲闌闌羣
瞻聽階庭競接聯清歡歌雅什列坐疊長筵積雪山城
白留賓地主賢

時蕭孟昉一人
供饌費百餘金

百年虛荏苒千里重纏

絲詩說慚匡鼎經傳想服虔他時魂夢繞應傍水雲邊

同藥公及諸子游青又

青原山谷
中名青又

晴冬風日好乘興恣攀躋嵐氣盈襟袖泉聲逐杖藜天
圍一握小峰截片雲低暗穴熊留館荒陂虎印泥杳冥
忘去住曲折失端倪置產緣茶圃分流潤麥畦野梅寒

早發谷鳥臘先啼白飲烹葵美青林采藥迷惠莊心共
遠支許手同携不盡青青色重看萬嶺西

哭李梅公少司馬

用杜哭李
尚書韵

武林投分日南浦盡歡年論學頻同席傷離強繫船忘
形真故舊把醞共林泉神劍歸何處東山竟寂然盛名

生隕謝耆德易崩騫史局家相繼房中句共傳

公次子
維饒官

庶常夫人朱
遠山有詩集鬢從樞輔改書向國門懸采筆斯文在交

情我輩偏青松凋雨雪白馬阻江天絮酒將雙淚遙傾

文水邊

雨宿南昌携具與商賢伯調伯璣小飲客舍伯衡

憲副適至同限七虞得二十四韵

天地酣歌短文章會合殊避人開慘淡得友失艱虞岍
滑愁官舫尊移就客厨立談良欸欸小酌太區區竹外
求羊徑林間嵇阮徒冰盤薦櫻筍香飯煮雕胡忽有高
軒過重教濁酒沽倒衣歡造次入坐亂喧呼詩思春江
濶燈花午夜徂沙寒沉野驚風急噪城烏屈宋同騷屑

曹劉定有無閣中招帝子階下走天吳拙宦生涯見窮
交骨髓枯心情難木石詞賦豈泥塗倚馬看君筆雕蟲
悔故吾奔騰從日月去住總江湖榻繼陳蕃下官將梅
尉俱深杯疎禮法雄辯捋髭鬚雨細侵朱檻星昏隱碧
梧風烟數子在戶牖百靈趨送老憑書帙憂時缺唾壺
隋珠好相贈莫厭卧菰蘆

臨江荅宋荔裳西湖見寄

君按察浙江坐蜚語
連繫至是難始解

老友幾時見頻年雙涕零傷離禁遠道多難逼頽齡路

歷羊腸盡身從虎口經定交憐蕩雨轉眼詫晨星吾子
真無敵高言誰見聽撫膺盤岱嶽搖指動滄溟揚馬親
齊轡莊騷類建瓴艱虞書不廢賓客戶難扃北寺長牋
贈西湖畫舫停衙齊連竹榻午夜竭銀餅才大偏嬰網
機危屢震霆卵巢垂殄滅日月付沉冥請室頭空白窮
途眼孰青被恩寬對簿決慙快揚庭時下石孤憤傳梁
獄饑虛憶楚萍檢書拚賣盡仗酒得無醒摧折驚魂斷
哀歌帶血腥浙潮雲淅淅楚樹雨泠泠混沌隨雕琢江

山備使令星搖埋劍匣雷殷化校亭執義同膠漆關情
甚鶴鴝鷹滂仍激烈王貢太伶仃久隔田園夢還浮江
漢舲十年思射虎七子豈枯螢往同在部曹有燕臺七子之目公等宜
朱紱吾將老翠屏長吟憑玉筍愁緒滿郊坰

送王仲昭還武林

時以吾友朱荔
蒙難後書至

武林多逸俊之子舊崢嶸浩蕩游京洛艱難亟友生荒
亭金鳳渚古寺石龍城一月詩盈帙雙江水共清翩翻
看翡翠怒掣走長鯨賞愜滄洲趣交游白首情離心百

金少卿八
卷四十三
結苦歸櫂片雲輕身世宜叢桂江天止杜蘅懷人書嬾
作拙吏計無成惟有蕭灘月隨君湖上明

官舍看牡丹

閣俯雙江水闌開千葉花歲蕤含夜雨灼爍爛朝霞蕊
疊翻堦重枝高出樹斜逐香蜂繞座倚檻客思家鐙下
金尊照風前錦幔遮多情娛老眼留賞駐年華夢想洛
陽勝虛聞姚魏誇但令春好在何惜滯天涯

寒食夜集得八齊

同毛大可沈治先徐
若彝高阮懷諸子

應節鑽榆火看花復杖藜江連官舍綠山抱女牆低粉
蝶晴初舞黃鶯晚尚啼論文停鼓吹選勝約攀躋風月
知春好悲歡得醉齊年年此時恨不管草萋萋

南浦贈徐原一孝廉二十韻

時徐有
父憂

昔別離筵促重來握手親烟霜真潦倒風木一悲辛思
苦才逾老時艱氣益振文章爭庾鮑兄弟屬星辰託詠
寧辭癖耽憂豈為貧五湖閒鼓棹萬卷日隨身憲府延
高會諸侯擁上賓英華盡京洛形勝攬齊秦羽獵篇如

錦河梁句損神容
心方浩蕩歸興且
逡巡榆次迴車暮
羅浮采藥春瘴江
占颶母雨洞識楓
人丹荔盤頻薦芳
蘭帶自紉書成方
物具詩在土風陳
魁壘時看劔雕鐫
妙斲輪荒亭問徐
孺驚坐禮陳遵
君數過陳伯璣
戰艦愁經眼
歌樓酒入唇岍園
香橘柚鄉味憶鱸
蓴立馬浮雲合分
襟白髮新何年玉
山過見爾獨嶙峋

答鄒程村進士十六韻

詞翰今時盛艱難
絕調孤相逢在南
浦高卧復東湖容

久登臨盡才多著作殊雄文搜要妙別曲寄歡娛賈董

生相並鄒枚譽不誣

君與董文友龔介眉有合刻

飛騰淹旅食歌醉

失窮途隋苑吹簫夜西陵賣酒壚

先是同游淮揚武林

賦成追鮑

照梅落問林逋曉日山空翠春雲樹有無風華傾坐客

樸野許潛夫憶別三江遠懷愁雙鬢枯青楓寒阜嶺黃

菊汎洪都聞道深嗟晚全身或藉愚烟波心浩蕩驛館

跡踟躕執耳慙勅敵窺班敢大儒題詩當縞帶斯道未

榛蕪

安成王枚臣進士自粵東歸不遠二千里見過接
對有詩兼懷吉州講學諸子

留滯羊城久過從鷓鴣遙離心驚泱歲情話劇連朝見
取吾何有相看意自消溪亭同倚檻山寺數聯鑣問路
風波濶憂時豺虎驕世途甘蹇劣吾道忍蕭條地憶螺
川勝朋來鷺渚饒微言昭日月高會逼烟霄講席今仍
在諸生誰見招沙寒雲滿樹江漲雨兼潮神物終當合
青松倘後凋因聲寄同志索處未飄搖

哭雷伯顓追悼及李叔則杜蒼舒二十韵

三子皆秦人李為前輩盛名數寓書來往杜相值西
湖姿岬甚偉雷流寓廣陵尤與余善己酉二月值孫
豹人言伯顓以去年臘月死李杜二君又先歿矣墮
淚成詩並見是篇

世罕憐才者天收作賦人相催成隕落吾老獨酸辛叔

則聲名久蒼舒邂逅親飛書來岱麓

叔則

握手記湖濱

蒼舒

敏捷李無敵魁梧杜絕倫深心推伯顓鴻筆奮西秦文

字經營苦江關旅寓貧詩尋孫楚說

豹人

家與仲宣鄰

王

夫

編纂連宵旦呼號動鬼神正誇同跋扈詎意頓沉淪

篋笥書猶在泉臺氣莫伸殘篇誰料理萬事一埃塵作

序勞玄晏談經許大春

李雷並有贈序王稱余講學鄒魯事

窮愁寧到骨

嘯傲肯謀身態憶粗豪好交憐懷抱真壺觴情契濶關

陝夢遠巡所痛蕪城近偏難尺素頻岳蓮摧菑菑玉樹

委荆榛海內知音失山中白髮新素車終隔遠雙淚染

松筠

重遊從姑

羅近溪先生
讀書講學處

誰信孤峰峭居然小有天
岷泉深窟穴杖屨入風烟
絕頂平如掌陵空突似拳
石梁飛碧漢書屋盛當年
萬象春花候雙江暮鳥邊
娑娑重懷古此意幾人傳

聞王西樵考功訃

海內文章伯斯人獨素心
風流爭玉樹氣類緬苔岑
戎楷官何忝陰何興不禁
百懼曾患難三仕總蕭森
雅詠耽吳越高懷託向禽
摧頽無鵬賦殄瘁失書淫
京輦追

高會壺觴伴苦吟同聲兄弟好銜痛蓼莪深名士希年
壽傷心自古今恨虛輔嗣塵淒斷伯牙琴八子情搖落

時同西樵兄弟有八家詩行世千秋事陸沉岱雲今黯淡回首一霑襟

三天洞同諸子作有序

歲甲寅十月三日屏跡水東吳雨若諸子自郡至為
洞壑游遂就地酌洞中稍酣吳濡筆掃巖紀人歲子
分賦得十韵將與此山共磨滅焉

幽境歡重踐追尋好友俱層巖開窈窕萬壑炯虛無顯

晦經營苦炎寒氣候殊
湫流殷地軸高戶裂天樞
洗洞

龍湫涌

湫泉歲一涌
漲謂之洗洞


排闥木客呼日車愁上下雲族起

須臾席地霜千葉炊松酒一壺
崖崎曾墮鹿穴黑敢藏
狐暝坐來神契疏觀啟衆愚
山靈護題字終古漫模糊

自浦城至建寧書事

南去文谿路灘聲曉夜聞
橫空攢島嶼捲地走風雲
回合山難斷青冥日易曛
舟人頻出沒嵐氣半氤氳
石見無魚穴林深絕鳥羣
劔稜欹側過眉睫死生分
孤客垂

堂戒驚流轉
權勤壺漿
荅三老能事
信翰君



學餘堂詩集卷四十三